

Ich freue mich für Dich über Dini Lebändigkeit

T = 196

C / am / F / G

Du sausisch hüt dur d'Wohnig – wie'nen Summersturm mit Föhn
Wo D'gspielt häsch häts ein Durenand - und Du findsch s'richtig schön.

S'isch alles under Wasser – wänn Du mal bade tuesch
Lärmsch wienen ganze Chindsgi – wänn'D e bitz uufuume muesch

Refrain: Ich freu mich über Dini Chraft
 de Power wo da isch
 Vo Herze freu ich mich für Dich
 dass Duuu - eso läbig bisch.

Hüt bisch du starch wie s'Mami – und wie ne Sirene luut
Bisch grad so schnäll wie de Papi – und häsch en Elefantehuut!

Bim Ässe häsch eis Chäferfäscht – s'hät Spuure überall
Und wänn Du chli veruse gasch - gönd all Tier schnäll in Stall

Refrain:

Du redisch und Du frögsch so viel – grad wie n'en Wasserfall
Wänn Du dur euse Garte stürmsch – dänn gits en Knall vum Überschall.

Wottschesch alles sälber mache – egal wie schwierig s'isch
Dich aalegge – go poschte – und schwümme wie n'en Fisch

Refrain:

Dini Chraft gaht hüt nach ine – du bisch ganz ruhig und still
Dini Fantasie hät Flügel – entstah tuet drus ganz viel.

Du malsch ganz bsundri Bilder – die strotzed voll vo Chraft
Und ohni dass viel Lärm git – häsch du hüt ganz viel gschafft!

Refrain:

Schnäbeli und Schlitzli – sind s'Wichtigscht wos hüt git
Rännsch füdliblutt dur d'Wältgschicht – das findsch de gröschti Hit.

Mit dine villne Fründe – stellsch du d'Wält uf de Chopf
Wer sich dir da in Wäg stellt – de isch en arme Tropf.

Refrain:

Wie n'en Erscht Auguscht Raggette - fätzisch Du durs Huus
Du häsch hüt soviel Tigerchraft - Dini Fründe packt de Gruus

Du häsch hüt soviel Energie - ch'glaub d'Wält dräit sich drum schnäller
Du rodisch wie ne Wildsau - vom Estrich bis in Chäller.

Refrain für de Schluss

S'chunnt vor, dass ich chli müed bin - nöd soviel mag verliede
Weisch Du wie mir das sälber stinkt - ich's lieber würd vermiede

Doch säg ich Dir - chasch sicher sii - mit Dir häts gar nüt z'tue!
S'isch richtig wichtig und drum Frähdachs - los mir jetzt guet zue:

Ich freu mich über Dini Chraft
de Power wo da isch
Vo Herze freu ich mich für Dich
dass Duuuu - eso läbig bisch.

Instrumental

Refrain: Ich freu mich über Dini Chraft
de Power wo da isch
Vo Herze freu ich mich für Dich
dass Duuu - eso läbig bisch.